

**BOSNA I HERCEGOVINA**

**Prijedlog**

**Z A K O N**

**O AGENCIJI ZA RAZVOJ INFORMACIJSKOG DRUŠTVA**

**BOSNE I HERCEGOVINE (ZARID)**

**SARAJEVO, juli, 2008. godine**

Na osnovu člana IV.4.a) Ustava Bosne i Hercegovine, Parlamentarna skupština Bosne i Hercegovine na sjednici Predstavničkog doma održanoj \_\_\_\_\_ godine i na sjednici Doma naroda održanoj \_\_\_\_\_ godine usvojila je

**ZAKON**  
**o Agenciji za razvoj informacijskog društva**  
**Bosne i Hercegovine (ZARID)**

**DIO PRVI - UVODNE ODREDBE**

**Član 1.**  
**(Predmet Zakona)**

Ovim se Zakonom uređuje osnivanje Agencije za razvoj informacijskog društva Bosne i Hercegovine, (u daljem tekstu: Agencija), ciljevi i principi njenog rada i funkcioniranja, finansiranje i djelokrug rada Agencije, njena organizacija, upravljanje Agencijom, saradnja i koordinacija rada s drugim nadležnim tijelima i institucijama.

**Član 2.**  
**(Definicije)**

Pojedini pojmovi upotrijebljeni u ovom zakonu imaju slijedeća značenja:

- a) Informacijsko-komunikacijska tehnologija (u daljem tekstu: IKT); generički pojam koji se odnosi na sva stanovišta obrade, upravljanja i prijenosa informacija.
- b) Informacijsko društvo; društvo u kojem su znanje i blagovremene, sveobuhvatne i tačne informacije osnovni upravljački resursi, koji osiguravaju napredak i budućnost svojim građanima. U informacijskom se društvu podrazumijeva masovna upotreba IKT-a, a posebno Interneta, kao instrumenta za postizanje boljih službenih rezultata u privrednom, obrazovnom, upravnom i socijalnom sektoru i svim drugim sektorima društva.
- c) Informacijski sistemi; uređena grupa različitih sastavnica, koje u međusobnoj saradnji obavljaju ulogu prikupljanja, obrade, čuvanja i izdavanja informacija i podataka. Komponente koje čine jedan informacijski sistem elektronski su uređaji (hardver), programi (softver), ljudi i organizacija.
- d) Jedinstvena baza podataka; jedinstvena grupa podataka organiziranih tako da specijalni program namijenjen radu s bazama podataka može brzo i tačno unijeti, odabrati ili izdvojiti željeni podatak.
- e) Internet; javno dostupni međunarodni, odnosno globalni sistem međusobno povezanih računara, koji koriste grupu standardiziranih komunikacijskih protokola (ustanovljeni način, standard ili format prijenosa podataka), zajedno s informacijskim sadržajima i uslugama, koji na taj način povezanih računara mogu pružiti korisnicima.

**Član 3.**  
**( Cilj rada Agencije)**

Cilj rada Agencije je razvoj informacijskog društva u Bosni i Hercegovini (u daljem tekstu: BiH), na osnovu razvoja i primjenom tehnologija informacijskog društva.

**Član 4.**  
**( Principi rada)**

- (1) Agencija će se u svom radu rukovoditi načelima javnosti i transparentnosti.
- (2) Agencija će povremeno i blagodobno informirati javnost o stanju razvoja i primjeni IKT u BiH.

**DIO DRUGI – STATUS I DJELOKRUG RADA AGENCIJE**

**Član 5.**  
**(Status Agencije)**

- (1) Agencija je samostalna upravna organizacija sa svojstvom pravne osobe.
- (2) Agencija je za svoj rad odgovorna Vijeću ministara Bosne i Hercegovine (u daljem tekstu: Vijeće ministara).

**Član 6.**  
**(Ustanovljavanje Agencije)**

- (1) Sjedište je Agencije u Sarajevu.
- (2) Agencija može, u skladu sa potrebom, formirati organizacione podružnice.
- (3) Sjedište organizacionih podružnica, utvrđuje Vijeće ministara na prijedlog Agencije.

**Član 7.**  
**(Sredstva Agencije)**

Agencija se finansira iz budžeta, koji se sastoji od sredstava iz državnog budžeta i ostvarenih samostalnih prihoda.

**Član 8.**  
**(Djelokrug rada Agencije)**

- (1) U saradnji s nadležnim tijelima državne uprave, posebno Ministarstvom komunikacija i prometa, nadležnim entitetskim i kantonalnim institucijama, naučnim i stručnim institucijama, javnim

poduzećima, privatnim sektorom, nevladinim sektorom i međunarodnim organizacijama, Agencija sudjeluje na provođenju programskih dokumenata i zadataka, a posebno se naglašava:

- a) Reklamne uloge informacijskog društva kao osnovne poluge civilog društva i razvoja demokracije;
- b) Implementiranje ciljeva postavljenih u osnovnim dokumentima Politike i Strategije razvoja informacijskog društva BiH;
- c) Preduzimanje konkretnih implementacijskih koraka u realiziranju projekata i razvojnih programa iz Akcionog plana razvoja informacijskog društva u BiH;
- d) Priprema operativnih sektorskih planova za razvoj informacijskog društva BiH;
- e) Koordiniranje pri implementiranju strateških državnih projekata za razvoj informacijske i komunikacijske infrastrukture;
- f) Predlaganje stimulativnih carinskih i poreznih mjera za razvoj informacijsko-komunikacijske industrije u BiH;
- g) Iniciranje i koordiniranje stvaranja tehnoloških razvojnih centara, kao što su tehnološki parkovi povezani sa industrijom, inkubacioni centri za razvoj IKT industrije, centri za podršku razvoju klusterske proizvodnje IKT proizvoda i slično;
- h) Promoviranje privrede zasnovanog na upotrebi elektronskog poslovanja u privatnom i javnom sektoru;
- i) Iniciranje ustanovljavanje pravnog i regulatornog okvira neophodnog za realiziranje Strategije razvoja informacijskog društva BiH;
- j) Potjecanje razvoja pravnog okvira za osiguranje prava i sloboda u informacijskom društvu i stvaranje uvjeta za jednakost u pristupu informacijskim tehnologijama i servisima za sve građane BiH;
- k) Promoviranje razvoja i uvođenja koncepta elektronske uprave (širenje znanja o konceptu elektronske uprave u tijelima uprave, ali i u javnosti, priprema i izvođenje obuke u vezi s uvođenjem sistema elektronske uprave, formiranje i koordiniranje rada Foruma za razvoj elektronske uprave i slično);
- l) Promoviranje informacijskog društva u okviru reforme obrazovnog sistema;
- m) Koordinira rad i pruža pomoć entitetskim agencijama za informaciono društvo u implementiranju strateških državnih projekata u vezi sudjelovanja IKT u reformi obrazovnog sistema (ojačavanje i harmoniziranje računarskih kapaciteta u nastavnim i naučno-istraživačkim institucijama, standardiziranje IKT kapaciteta obrazovnih i naučno istraživačkih ustanova i slično);
- n) Promoviranje i potjecanje istraživanja i razvoja u primjeni tehnologija informacionog društva;
- o) Koordiniranje pri uspostavi i razvoju obrazovne i istraživačke mreže BiH;
- p) Promoviranje pri implementiranju projekata usmjerenih na umanjeње "tehnološkog raskoraka", interno u BiH među različitim socijalnim kategorijama, kao i između BiH i razvijenih zemalja;
- r) Sudjelovanje u radu i koordiniranju razvoja informacijskog društva BiH sa slični inicijativama u svijetu.
- s) Potjecanje razvoja digitaliziranja domaćih digitalnih sadržaja i usluga u oblastima od javnog interesa; kulturnog, zdravstvenog, naučnog, obrazovnog, istorijskih i geografskih izvorišta itd.
- t) Planiranje, uvođenje i razvoj osnovnih i proširenih servisa e-Vlade.

(2) U saradnji s nadležnim tijelima uprave, privatnim sektorom, javnim poduzećima, nevladinim sektorom i međunarodnim organizacijama, Agencija koordinira i dio poslova verificiranja i certificiranja na državnom nivou u oblasti informacijsko-komunikacijskih tehnologija:

- a) Koordiniranje i praćenje rada u domenu dodjeljivanja elektronskih potpisa i certifikata.
- b) Koordiniranje i organiziranje stručne verifikacije projekata iz oblasti informacijsko-komunikacijskih tehnologija koji su od strateškog značaja za državu i koji se ostvaruju

unutar nadležnosti pojedinih ministarstava Vijeća ministara i međunarodnih organizacija, a zahtijevaju odobrenje/potvrdu od strane Vijeća ministara, ukoliko drugim zakonom nije drugačije regulirano;

- c) Standardiziranje i uvođenje tehničkih normativa kojima se uređuju razvoj, nabavka, upotreba i zaštita IKT i programske opreme u institucijama BiH;
- d) Odobravanje upotrebe informacijskih sistema u tijelima uprave, ukoliko drugim zakonom nije drugačije regulirano;
- e) Utvrđivanje tehničkih procedura i pravila u vezi pristupa, korištenja, zaštite i sigurnosti podataka i evidencija, ukoliko drugim zakonom nije drugačije regulirano;
- f) Definiranje koncepta i interkonekcijska pravila za informacijsku međuoperativnost u javnom sektoru, prvenstveno u upravi;
- g) Koordiniranje analize i preporuke za primjenu softverskih rješenja zasnovanih na otvorenim platformama u javnoj upravi;
- h) Standardiziranje i akreditiranje edukacijskih i ispitnih centara koji omogućavaju certificiranje građana u IKT oblasti kroz formu post-obrazovanja i doživotnog učenja (dopunsko obrazovanje, obrazovanje uz rad i slično) u saradnji sa nadležnim ministarstvom;
- i) Administriranje državnog Internet domene Bosne i Hercegovine (.ba);
- j) Vršiti funkciju državnog kompjutorskog centra za hitne slučajeve, kao i pružanje tehničke podrške u oblastima "Cyber kriminala", ukoliko drugim zakonom nije drugačije regulirano;
- k) Koordiniranje sigurnije Internet prakse aktivnostima protiv ilegalnih sadržaja, kao i podrška kvalitetnom nivou evropeizma.

(3) Agencija je nadležna za standardiziranje i koordiniranje operativnih obrada i arhiviranje podataka i informacija kao javnog dobra na državnom nivou, odnosno za standardiziranje odgovarajućih jednoobraznih evidencija i baza podataka na državnom nivou u skladu sa zakonima. Agencija obavlja također i slijedeće poslove:

- a) Standardiziranje baze podataka koje su u nadležnosti države BiH, ukoliko drugim zakonom nije drugačije regulirano;
- b) Koordiniranje pri formiranju evidencija na nivou BiH, kao i njihovo arhiviranje, ukoliko drugim zakonom nije drugačije regulirano;
- c) Standardiziranje državne infrastrukture, uvjeta za rad i zaštitu podataka, te druge tehničke preduvjete za neometano funkcioniranje baza podataka koje su u nadležnosti ministarstava, institucija i tijela, u skladu sa njihovim zahtjevom i zakonom, ukoliko drugim zakonom nije drugačije regulirano;
- d) Standardiziranje procedure pokretanja, upravljanja i organizacije informacijskih projekata u skladu sa Strategijom i Akcionim planom kao i procedura za izbor dobavljača za realiziranje ovih projekata;
- e) Predlaganje i koordiniranje organizacije većih samostalnih informatičkih projekata koji su u nadležnosti države BiH;
- f) Standardiziranje i koordiniranje pri uspostavi, razvoju i unapređenju magistralne mreže za prijenos podataka, te informacijsko-komunikacijske infrastrukture i drugih kapaciteta, ukoliko drugim zakonom nije drugačije regulirano;
- g) Standardiziranje i koordiniranje rada organizacionih jedinica koje se bave informacijskom djelatnosti u tijelima uprave;
- h) Standardiziranje procedure za pokretanje, upravljanje i organizacija informacijskih projekata zajedničkih za više ministarstava Vijeća ministara i drugih tijela uprave;
- i) Standardiziranje procedure za IKT Outsource poslove i njihovo uvođenje u sve organizacione dijelove državne uprave;
- j) Koordiniranje u fazama pokretanja, realiziranja i eksploatiranja informacijskih projekata zajedničkih za više ministarstava Vijeća ministara i drugih tijela uprave;

- k) Standardiziranje jedinstvenog Internet portala državne uprave BiH, njegovog održavanja i zaštite Internet, SMS i drugih pristupnih kanala uslugama javne uprave;
- l) Iniciranje i predlaganje metodologije za razvoj aplikacija i sistema u javnoj upravi.
- m) Analiziranje mogućnosti i preporuke za primjenu softverskih rješenja zasnovanih na otvorenim platformama u javnoj upravi, te iniciranje njihove primjene;
- n) Stručno verificiranje projekata iz oblasti IKT koji su od strateške važnosti za državu, a koji se realiziraju unutar nadležnosti pojedinih ministarstava;

(4) Agencija daje podršku praćenju razvoja informacijskog društva BiH. Agencija saraduje i razmjenjuje podatke s institucijama koje rade na poslovima praćenja razvoja informacijskog društva u BiH i sudjeluje u prikupljanju i obradi podataka kroz koje se generiraju indikatori razvoja informacijskog društva BiH.

## **DIO TREĆI – ORGANIZACIJA I UPRAVLJANJE**

### **Član 9. (Organizacija)**

- (1) Unutrašnja se organizacija Agencije uređuje pravilnikom o unutrašnjoj organizaciji.
- (2) Pravilnik o unutrašnjoj organizaciji donosi direktor, uz saglasnost Vijeća agencije. Ovaj pravilnik se smatra donesenim kada ga svojom odlukom potvrdi Vijeće ministara.

### **Član 10. (Tijela Agencije)**

Tijela Agencije su Vijeće agencije i direktor.

### **Član 11. (Vijeće agencije)**

- (1) Vijeće agencije ima sedam članova.
- (2) Članove Vijeća agencije imenuje Vijeće ministara, na prijedlog ministra komunikacija i prometa usaglašen sa vladama entiteta i Vladom Brčko Distrikta Bosne i Hercegovine u pogledu njihovih kandidata.
- (3) Za članove Vijeća agencije predlažu se kandidati:
  - a) vlada entiteta i Brčko Distrikta Bosne i Hercegovine (po jedan kandidat),
  - b) Akademska zajednica BiH – Rektorska konferencija (jedan kandidat),
  - c) IKT industrija – Udruženje IKT industrije na nivou BiH (jedan kandidat),
  - d) Ministarstvo komunikacija i prometa (dva kandidata)
- (4) Ukoliko vlade entiteta, Brčko Distrikta Bosne i Hercegovine, Akademska zajednica BiH, ili Udruženje IKT industrije na nivou BiH, na zahtjev ministra komunikacija i prometa, ne predlože svoje kandidate u roku od 45 dana, ministar komunikacija i prometa će sam predložiti kandidata/e.

(5) Članovi Vijeća agencije se imenuju na period od četiri godine, s mogućnošću samo još jednog ponovnog imenovanja.

## **Član 12.** **(Uvjeti imenovanja)**

(1) Za člana Vijeća agencije može biti imenovana osoba koja ima VII stepen stručne spreme i koja je stručnjak iz oblasti djelokruga rada Agencije.

- (2) Za člana Vijeća agencije ne može se imenovati osoba
- a) koja je po osnovu radnog odnosa angažirana u Agenciji,
  - b) koja je funkcioner na zakonodavnim ili izvršnim funkcijama, na bilo kojem nivou vlasti,
  - c) koja je član tijela političke partije.

(3) Vijeće ministara je dužno kod imenovanja članova Vijeća agencije osigurati jednaku zastupljenost svih konstitutivnih naroda u Bosni i Hercegovini.

## **Član 13.** **(Djelokrug rada Vijeća agencije)**

- (1) Vijeće agencije:
- a) osigurava da Agencija djeluje u javnom interesu,
  - b) usvaja godišnji program rada, finansijski plan i izvještaje o radu Agencije,
  - c) donosi opće akte Agencije, izuzev Pravilnika o unutrašnjoj organizaciji,
  - d) nadzire poslovanje Agencije,
  - e) obavlja druge poslove određene ovim ili posebnim zakonom.

(2) Vijeće agencije ili osobe koje Vijeće agencije ovlasti, mogu pregledati poslovne knjige i drugu dokumentaciju Agencije.

## **Član 14.** **(Dužnosti i odgovornosti članova Vijeća agencije)**

(1) Članovi Vijeća agencije moraju se u radu ponašati nepristrasno i s pažnjom dobrog privrednika.

(2) Članovi Vijeća agencije moraju prijaviti svaki interes koji imaju u djelokrugu rada Agencije i izuzimaju se od odlučivanja u slučajevima u kojim se pojavljuje sukob interesa.

(3) Članovi Vijeća agencije su odgovorni za štetu koja je nastala kao posljedica kršenja njihovih obaveza utvrđenih ovim i posebnim zakonima.

**Član 15.**  
**(Rad Vijeća agencije)**

(1) Vijeće agencije donosi poslovnik o svom radu.

(2) Vijeće agencije donosi odluke većinom glasova svojih članova uz najmanje po jedan glas članova iz svakog konstitutivnog naroda.

(3) Vijeće agencije godišnje bira svog predsjedavajućeg. Predsjedavajući je odgovoran za blagovremeno održavanje i pripremu sjednica Vijeća agencije i potpisuje akte Vijeća agencije.

**Član 16.**  
**(Nakande za rad članova Vijeća agencije)**

Članovi Vijeća agencije imaju pravo na naknadu za svoj rad, koja se utvrđuje odlukom Vijeća ministara.

**Član 17.**  
**(Prestanak mandata)**

(1) Članu Vijeća agencije mandat prestaje istekom roka na koji je imenovan.

(2) Članu Vijeća agencije mandat prestaje prije isteka roka na koji je imenovan

- a) podnošenjem ostavke, ili
- b) razrješenjem.

(3) Ostavka se podnosi Vijeću ministara. Podnositelj ostavke je dužan nastaviti obavljati svoje dužnosti do imenovanja novog člana Vijeća agencije.

(4) Vijeće ministara BiH će razriješiti člana Vijeća agencije ako ne izvršava obaveze utvrđene ovim zakonom ili općim aktom Agencije, ili ih izvršava nesavjesno i nestručno. Postupak u kojem se utvrđuje postojanje razloga za razrješenje pokreće Vijeće ministara, na sopstvenu inicijativu, ili na zahtjev Vijeća agencije, a provodi ga ad hoc imenovano tijelo Vijeća ministara.

**Član 18.**  
**(Direktor Agencije i zamjenici direktora)**

(1) Agencijom rukovodi direktor Agencije i dva zamjenika direktora koji su iz reda tri konstitutivna naroda u Bosni i Hercegovini.

(2) Direktora Agencije i zamjenike direktora imenuje Vijeće ministara prema Zakonu o ministarskim imenovanjima, imenovanjima Vijeća ministara i drugim imenovanjima Bosne i Hercegovine („Službeni glasnik BiH“, broj 7/03).

(3) Direktor Agencije i zamjenici direktora se imenuje na period od četiri godine, s mogućnošću samo još jednog ponovnog imenovanja.



**Član 19.**  
**(Djelokrug rada direktora i zamjenika direktora)**

(1) Direktor:

- a) rukovodi, u saradnji s zamjenicima, radom i poslovanjem Agencije,
- b) zastupa i predstavlja Agenciju,
- c) osigurava da Agencija posluje u skladu sa ovim i posebnim zakonima,
- d) predlaže Vijeću agencije godišnji program rada, finansijski plan i izvještaj o radu Agencije
- e) donosi pojedinačne akte Agencije,
- f) odlučuje o pravima, obavezama i odgovornostima zaposlenih,
- g) priprema i provodi odluke Vijeća agencije,
- h) obavlja druge poslove određene ovim ili posebnim zakonom.

(2) Zamjenici direktora pomažu direktoru u obavljanju dužnosti Agencije, te prema uputama direktora mogu izvršavati sve funkcije, obaveze i ovlaštenja direktora.

(3) Direktor pismeno ovlašćuje jednog od zamjenika direktora da ga zamjenjuje u slučaju spriječenosti direktora da obavlja svoju dužnost, i utvrđuje njegova ovlaštenja.

**DIO ČETVRTI – OSTALE ODREDBE**

**Član 20.**  
**(Nacionalna zastupljenost)**

Struktura državnih službenika, kao i ostalih službenika Agencije, odražavati će nacionalnu strukturu stanovništva BiH u skladu sa posljednjem popisu stanovništva BiH.

**Član 21.**  
**(Pružanje podrške i službena saradnja)**

- (1) Pri vršenju poslova iz svog djelokruga Agencija saraduje i koordinira rad s nadležnim tijelima entitetskih i kantonalnih vlada, Vlade Brčko Distrikta Bosne i Hercegovine, kao i s općinskim tijelima u BiH. U svrhu promocije razvoja informacijskog društva BiH Agencija također saraduje i koordinira rad s drugim institucijama vezanim za ovu oblast, kao što su institucije poslova standardiziranja, statistike, regulative i drugo.
- (2) Agencija u svom radu posebno saraduje s entitetskim agencijama za informacijsko društvo, a u skladu sa svojom nadležnosti.

**Član 22.**  
**(Osiguranje kvaliteta rada Agencije)**

- (1) Agencija će uvesti sistem upravljanja kvalitetom prema zakonima, propisima i standardima BiH i međunarodnim standardima i to najkasnije dvije godine nakon osnivanja Agencije.
- (2) Sistem će upravljanja kvalitetom Agencija certificirati kod odgovarajućeg tijela akreditiranog za ovu vrstu certificiranja na nivou Evropske unije, a najkasnije tri godine po osnivanju Agencije.

## **DIO PETI - PRIJELAZNE I ZAVRŠNE ODREDBE**

### **Član 23. (Prijelazne odredbe)**

(1) Vijeće ministara je dužno u roku od 30 dana od dana stupanja na snagu ovog zakona započeti postupak izbora direktora i zamjenika direktora.

(2) Ministar komunikacija i prometa je dužan u roku od 60 dana od dana stupanja na snagu ovog zakona započeti postupak predlaganja kandidata za Vijeće agencije.

### **Član 24. (Stupanje na snagu)**

Ovaj zakon stupa na snagu osmog dana od dana objave u «Službenom glasniku BiH».

PS BiH broj \_\_\_\_\_  
\_\_\_\_\_ godine  
Sarajevo

Predsjedavajući  
Predstavničkog doma  
Parlamentarne skupštine BiH

Predsjedavajući  
Doma naroda  
Parlamentarne skupštine BiH

# O B R A Z L O Ž E N J E

Nacrta zakona o Agenciji za razvoj informacionog društva Bosne i Hercegovine

## I. USTAVNI OSNOV

Ustavni osnov za donošenje ovog zakona je sadržana u članu IV.4.a) Ustava Bosne i Hercegovine, prema kojem je Parlamentarna Skupština Bosne i Hercegovine nadležna za donošenje zakona koji su potrebni za provođenje odluka Predsjedništva Bosne i Hercegovine ili za vršenje funkcije po ovom ustavu.

## II. RAZLOZI ZA DONOŠENJE OVOG ZAKONA

Vijeće ministara Bosne i Hercegovine je na 69. sjednici održanoj 16.11.2004. godine usvojilo Politiku, Strategiju i Akcioni plan razvoja informacionog društva u Bosni i Hercegovini. Navedeni dokumenti su, rukovodeći se između ostalog i *eSEEurope* inicijativom Pakta stabilnosti, jasno identificirali potrebu postojanja posebne institucije na nivou BiH u čijoj bi nadležnosti bili razvoj i koordinacija razvoja informacionog društva u BiH. U tom smislu, u tački 4.4 Politike razvoja informacionog društva je eksplicitno postavljena obaveza formiranja Agencije za razvoj informacionog društva kao posebne organizacije na nivou BiH, koja će imati jednu od ključnih uloga u implementiranju Politike i Strategije razvoja informacionog društva u BiH.

## III. NAČELA NA KOJIM SE ZASNIVA ZAKON

Osnovna načela na kojim se zasniva ovaj zakon su:

- načelo zakonitosti,
- načelo transparentnosti i
- načelo javnosti

## IV. OBRAZLOŽENJE PREDLOŽENIH PRAVNIH RJEŠENJA

### DIO PRVI - UVODNE ODREDBE

Čl. 1 – 4. ovog zakona sadrži Uvodne odredbe.

U članu 1. definiran je predmet Zakona, a u članu 2. definirano je značenje pojedinih pojmova koji su dati u Zakonu.

U skladu sa Politikom razvoja informacionog društva, cilj rada Agencije je utvrđen članom 3, kao razvoj informacijskog društva u BiH na osnovu razvoja i primjenom tehnologija informacijskog društva

U članu 4. su kao naročito značajni principi rada Agencije, definirani javnost i transparentnost njenog rada.

### DIO DRUGI – STATUS I DJELOKRUG RADA AGENCIJE

Član 5.- (Status Agencije)

U skladu sa Politikom razvoja informacionog društva, Agencija se formira kao samostalna upravna organizacija, odgovorna za svoj rad Vijeću ministara BiH.

#### Član 6.- (Ustanovljavanje Agencije)

S obzirom na djelokrug rada Agencije, predloženo je da sjedište Agencije bude u Sarajevu, te da Agencija može, po potrebi, formirati organizacione jedinice čije sjedište utvrđuje Vijeće ministara na prijedlog Agencije

#### Član 7.- (Sredstva Agencije)

Kao samostalna upravna organizacija, Agencija će se finansirati iz budžeta koji se sastoji od sredstava državnog budžeta i ostvarenih samostalnih prihoda.

#### Član 8.- (Djelokrug rada Agencije)

U ovom članu su detaljno utvrđeni poslovi Agencije, dati kao poslovi koordiniranja i poslovi razvoja u oblasti informacijskog društva.

### DIO TREĆI - ORGANIZACIJA I UPRAVLJANJE

#### Član 9.

Ovim članom se uređuje donošenje Pravilnika o unutrašnjoj organizaciji Agencije

#### Član 10.- (Tijela Agencije)

Ovim članom su kao tijela Agencije određeni Vijeće agencije i direktor.

#### Član 11.- (Vijeće Agencije)

Ovim članom se uređuje sastav i imenovanje Vijeća agencije te trajanje mandata njegovih članova. Način imenovanja osigurava zastupljenost akademske zajednice, institucija vlasti i IKT industrije.

#### Član 12.- (Uvjeti imenovanja)

Ovim članom su utvrđeni uvjeti za imenovanje članova Vijeća agencije.

#### Član 13.- (Djelokrug rada Vijeća agencije)

Članom 13. je utvrđen djelokrug rada Vijeća agencija kao tijela koji nadzire poslovanje Agencije i donosi strateške odluke.

#### Član 14. (Dužnosti i odgovornosti članova Vijeća agencije)

Odredbama ovog člana se utvrđuju dužnosti članova Vijeća agencije koji se u svom radu moraju ponašati nepristrasno i s pažnjom dobrog privrednika.

#### Član 15. (Rad Vijeća agencije)

Ovim članom se uređuje način rada Vijeća agencije

#### Član 16. (Nakande za rad članova Vijeća agencije)

Prema ovom članu članovi Vijeća agencije imaju pravo na naknadu za svoj rad, koja se utvrđuje odlukom Vijeća ministara.

#### Član 17. (Prestanak mandata)

Utvrđeno je da članu Vijeća agencije mandat prestaje prije isteka roka na koji je imenovan podnošenjem ostavke, ili razrješenjem

Član 18. (Direktor i zamjenici direktora)

Odredbama ovog člana se određuje da radom Agencije rukovode direktor Agencije i dva zamjenika direktora koji su iz reda tri konstitutivna naroda u Bosni i Hercegovini, a imenuje ih Vijeće ministara BiH

Član 19. (Djelokrug rada direktora i zamjenika direktora)

Ovim članom se uređuju ovlaštenja, obaveze i odgovornosti direktora i zamjenika direktora.

#### DIO ČETVRTI – OSTALE ODREDBE

Član 20. (Nacionalna zastupljenost)

Ovim se članom određuje da će struktura državnih službenika, kao i ostalih službenika Agencije, odražavati nacionalnu strukturu stanovništva BiH u skladu sa posljednjim popisom stanovništva BiH.

Član 21. (Pružanje podrške i službena saradnja)

Prema ovom članu, Agencija saraduje i koordinira rad s nadležnim tijelima entitetskih i kantonalnih vlada, Vlade Brčko Distrikta BiH, kao i s općinskim tijelima u BiH i također saraduje i koordinira rad s drugim institucijama vezanim za ovu oblast, kao što su institucije poslova standardiziranja, statistike, regulative i drugo.

Član 22. (Osiguranje kvaliteta rada Agencije)

Ovim članom se predviđa da će Agencija uvesti sistem upravljanja kvalitetom prema zakonima, propisima i standardima BiH i međunarodnim standardima i to najkasnije dvije godine nakon osnivanja Agencije.

#### DIO PETI - PRIJELAZNE I ZAVRŠNE ODREDBE

Član 23.- (Prijelazne odredbe)

Prijelaznim odredbama se utvrđuju rokovi u kojima će se započeti postupak imenovanja direktora i zamjenika direktora, te predlaganja kandidata za članove Vijeća agencije.

Član 24.- (Stupanje na snagu)

Ovim članom se određuje da Zakon stupa na snagu osmog dana od dana objave.

#### **V. FINANSIJSKA SREDSTVA POTREBNA ZA PROVOĐENJE OVOG ZAKONA**

Usvajanje zakona, a potom i uspostavljanje Agencije za razvoj informacionog društva trebalo bi da uslijedi tokom 2008. godine. Sredstva za rad Agencije u 2008. godini osigurala bi se iz sredstava rezerve Budžeta institucija Bosne i Hercegovine i međunarodnih obaveza Bosne i Hercegovine za 2008. godinu. Zahtjev za dodjelu pomenutih sredstava podnio bi direktor Agencije prema planu aktivnosti koje bi Agencija objektivno mogla da obavi u 2008. godini.

U skladu sa Memorandumom o razumijevanju potpisanim između Ministarstva i UNDP-ija u narednom periodu UNDP će organizirati grupu informatičara, za čiji će rad osigurati potrebna sredstva, a koja će raditi u Ministarstvu komunikacija i prometa tokom naredne dvije godine. Pomenuta grupa će pored ostalog biti zadužena da pruži stručnu pomoć pri uspostavljanju i otpočinjanju sa radom Agencije, što će imati pozitivnog utjecaja na manji iznos sredstava potrebnih u prvoj fazi rada Agencije.

## **VI. KONSULTACIJE VOĐENE U PROCESU IZRADE ZAKONA**

Nacrt zakona o Agenciji za razvoj informacionog društva izradila je radna grupa čiji su članovi pored zaposlenih u MKP bili i predstavnici drugih institucija BiH (Direkcija CIPS-a), te privatnog sektora. Pored toga Nacrt zakona nalazi se i na web stranici Ministarstva [www.mkt.gov.ba](http://www.mkt.gov.ba) sa pozivom za davanje komentara i prijedloga.

O Nacrtu zakona pribavljeno je mišljenje entitetskih vlada, te nadležnih institucija BiH